



Sesida dals

Communitgà ils

Protocol nr.

22 d'avust 2023

23 d'avust 2023

669/2023

### **Incumbensa Stiffler**

concernent l'analisa da la procedura d'admissiun per classas da talents

### **Resposta da la Regenza**

Il chantun Grischun dispona dal dumber da persunas talentadas il pli aut en Svizra en proporziun cun la grondezza da la populaziun, sch'ins considerescha las Swiss Olympic Talent Cards. La raschun per quai è segir er la promoziun relativamain vasta en la cumparegliaziun interchantunala en las scolas grischunas da talents. Quai ple- da per ina procedura d'admissiun adequata che funcziuna da princip. Tuttina stoi ve- gnir menziunà, che l'identificaziun e la selecziun da talents per l'entir sistem da sport ed er per la musica è ina sfida. Pervia dals numerus facturs d'influenza complexs sin il svilup d'uffants e da giuvenils, n'èsi strusch pussaivel da far prognosas a lunga vista durant l'uffanza e durant la pubertad. Dal punct da vista scientific è la validitad da prognosa tar l'identificaziun da talents avant la pubertad spezialmain bassa ed ils resultats da concurrenza n'èn nagin indicatur valaivel per la futura capacitad da pre- staziun tar la generaziun fitg giuvna. L'identificaziun da talents en la vegliadetgna da 13 fin 15 onns vala perquai adina sco avischinaziun la meglra pussaivla e sto vegnir realisada sche pussaivel en moda multidimensiunala, sistematica, transparenta ed objectiva. Per pudair cuntanscher pli tard in nivel da prestaziun aut, èn decisivas ultra da la constituziun fisica actuala cunzunt er la persunalitad e la motivaziun da presta- zion. L'idea directiva da la selecziun da talents sa cloma perquai: «Betg ils actual- main meglers, mabain ils pli adattads».

En il rom da l'examinaziun da las incumbensas e da las prestaziuns vegnan actual- main examinadas tranter auter l'excorporaziun da l'examen d'admissiun a las scolas da talents ed ina contingentaziun da las plazzas da scola da talents. En quest con- nex han già lieu differents lavuratori ensemen cun las scolas da talents e cun lur

coordinaturas e coordinaturs, e singuls potenzials da simplificaziun e d'optimaziun èn gia vegnids identifitgads. In'analisa quantitativa vegn anc elavurada. Ultra da quai è planisada l'integraziun da las federaziuns da sport e da musica, en spezial per la validaziun specifica dal potenzial.

Cun las vias d'atlets specificas per las disciplinas da sport che sa basan sin il concept general davart il svilup da sport e d'atlets «FTEM Svizra» existan per mintga disciplina da sport recumandaziuns davart la necessitad d'ina soluziun da scola. A maun da questas vias d'atlets po vegnir mussà – ensemen cun la chargia da temp necessaria per il trenament e per las concorrenzas – il basegn u eventualmain la refusa d'in basegn per ina soluziun da classas da talents da la disciplina da sport correspondent. Insatge cumparegliabel sto anc vegnir elavurà per la musica.

Sa basond sin questas explicaziuns propona la Regenza al Cussegl grond d'acceptar questa incumbensa.



En num da la Regenza

Il president:

Peter Peyer

Il cancellier:

Daniel Spadin